

四庫全書

集部

欽定四庫全書

宋詩紀事卷七十九

錢塘厲鶚撰

張琰

琰字汝玉廣陵人身七尺長髯有節槩補州牙
兵隨制置李庭芝潰圍南赴行在所追者及之
麾下鳥獸散琰獨鬪死

出塞曲

腰間插雄劍中夜龍虎吼平明登前途萬里不回首男

兒當野死豈為印如斗忠誠表壯節燦爛千古後
朝發山陽去暮宿清水頭上馬左右射捷下如獼猴先
發服勇決手提血髑髏兵家互勝負凡百慎前籌

官柳

不見樓東黃布帘樹猶如此我何堪裊裊亭亭忒無賴
又將春色誤江南

以上谷音

熊與鮓

與鮓字天樂豫章人性介澹無妻不食肉通經

史百氏之書布衣草屨遨遊諸名山尤嗜彈琴
草書

唐元宗鐵像

魏冠攢疊碧雲花坐閱山中幾歲華莫把金丹輕點化
正愁生死困安家

木平飼龍亭次韻方巨山

耳見何如得眼聞山根磅礴極初分浮漚起滅自潭影
大地晴陰空嶺雲何處老人來聽講他年少府有移文

由來清調須吾輩幸不山王媿五君

以上谷音

晏父

父字明榮宜春人風度秀整主趙崇灃後灃逮繫父自請詣獄俱以瘐死

訪吳

平生一語不冝吐浩然披髮行西林美人十日跨驢出黃葉堆門雲雪深

夢中

春樹年年少寒雲浦浦連片帆高浪起斗酒夕陽偏沙
市懷司馬州城笑老邊太平冠蓋盡爾敢望諸賢

以上
谷音

楊應登

應登字幼平臨江人寬厚長者有德行言辭七
試國子不第退就耕牧老于南塘

水宿

水宿逢今雨春歸返故園聖朝臣已老往事客何言乞
米分鄰里看書到子孫蒼茫不可會一笑了清樽

寄趙梅州

江城雁叫天如水寒色蒼蒼草木死哀歌未斷月東出
有才無命可流涕今我不樂思梅州東帶深衣百僚底
天下規矩見卓絕龍章麟角諸公子白頭時節得蠻府
歸來閉門呼不起惆悵平生狗馬病風后力牧長已矣
為公問酒日日酤熏天富貴憂患始

以上谷音

楊雯

雯字天章應登之孫

迢迢空同山

迢迢空同山乃在西極巔玉泉陰靈芝上有千歲仙安
得凌風翼相從白雲間神仙本冥漠天運仍推遷不如
酌我酒或得成自然田父要我語飲者亦非賢願君長
獨醒加餐足高年

宋武帝廟

溪聲答松風巨石出老拳古樹不知名岌岌蛟龍纏夕
陰互出沒秋華帶芳鮮蔥蔥帝王氣棟宇垂千年虎賁

秉霜戟慘澹生雲烟宮人翠龍駕手持玉連蜷昌明坐
恍惚精神雷在天大呼司雍間旬月無秦燕昔為萬夫
特今受衆目憐石馬亦埋沒歲時草芊芊小臣異代士
見之淚迸泉齊人思爽鳩蜀人哀杜鵑江東舊正朔禮
奉敢不虔但願君王心不忘載荻船下山又再拜白日
當空懸

北客

北客相催發一日舉千帆遙憐庾開府歲晚望江南

宿峽市

人烟正搖落樓笛頗清圓老樹依山驛東風上峽船江湖萬里外燈火十年前世路能令老吾生且醉眠

早春

不知何處碧雲鄉冉冉平生可斷腸怪底乾坤惟理在老來歲月更心長城頭急鼓千家夢江上殘梅一水香自作醉侯開醉國笑人奔走為誰忙

以上谷音

趙卯發

卯發昌州人通判池州權州事元兵至同妻雍

氏縊死

裂衣書詩寄弟

城池不高深無財又無兵惟有死報國來生作弟兄

昭忠

逸詠注

唐 珏

珏字玉潛號菊山會稽人

冬青行

馬箠問骯行南面欲起語野麝尚屯束何物敢盜貳餘
花拾飄蕩白日哀后土六合忽怪事蛻龍挂茅宇老天
鑒區區千載護風雨

冬青花不可折南風吹涼積香雪遙遙翠蓋萬年枝上
有鳳巢下龍穴君不見犬之年羊之月霹靂一聲天地
裂

夢中作

曰瑄按遂昌雜錄作林景熙今從輟耕錄
作珏詩

珠亡忽震蛟龍睡軒弊寧忘犬馬情親拾寒瓊出幽草

四山風雨鬼神驚

一坏自築珠丘土雙匣親傳竺國經獨有春風知此意
年年杜宇哭冬青

昭陵玉匣走天涯金粟堆寒起暮鴉水到蘭亭轉嗚咽
不知真帖落誰家

珠臈玉雁又成埃斑竹臨江首重回猶憶年時寒食節
天家一騎奉香來

輟耕錄歲戌寅有總江南浮屠者嘉禾揚喇勒智
恃恩橫肆勢跋扈人不可具狀十二月十有二日

帥徒役頓蕭山發趙氏諸陵寢至斷殘支體攫
珠襦玉押焚其齒棄骨草莽間時珏年三十二
歲聞之痛憤亟貨其家具得白金百星許執券
行貸得白金又百星許乃具酒醪市羊豕邀里
中少年若干輩狎坐轟飲酒且酣少年起請曰
君儒者若是將何為焉唐慘然具以告願收遺
骸共瘞之衆謝曰諾中一少年曰發丘中郎將
耽耽餓虎事露奈何唐曰余固籌矣今四郊多
暴骨取竄以易誰復知之乃斲文本為匱複黃
絹為囊各署其表曰某陵某陵分委而散遣之
絕地以藏為文而告詰旦事訖來集出白金美
餘以酬戒勿泄越七日總浮屠下令哀陵骨離
置牛馬枯骸中築一塔壓之名曰鎮南杭民悲
切不忍仰視了不知陵骨之猶存也禍淫不爽
流傳京師上達四聰天怒赫赫飛風雷號令梓
首禍者北焉山陰人始有籍籍傳唐氏者由是

唐之義風震動吳越聲生勢長若胥江掀八月之濤名雖高困固自若明年己卯後上元兩日唐出觀燈歸忽坐隕息奄奄若將絕者良久始蘇曰吾見黃衣吏持文書來告曰王召君導之往觀闕魏我宮宇靚麗殆非人世間有一冕旒坐殿上數黃衣貴人逡巡降揖曰藉君掩骸其有以報唐乃陞謁造王前王謂曰汝受命宴且貧兼無妻若于今忠義動天帝命賜汝伉儷子三人田三頃拜謝降出遂覺罔不知其何也踰時越有治中袁俊齋至始下車為子求師有以唐薦者一見置賓館一日問曰吾渡江聞有唐氏瘞宋諸陵骨子豈其宗耶左右指君曰此是已袁大駭拱手曰君此舉豫讓不能抗也曳之坐北面而納拜焉禮敬特加情款益篤叩知家徒四壁惻然嗟矜語左右曰唐先生家甚寒吾當料理使有妻有田以給左右逢迎爰詠爰度

不數月二事俱愜。聘婦偶故國之公女。負郭食
故國之公田。所費一一自袁出人。固奇唐之節
而又奇唐之遇。兩高之曰二公。真義士。爾後獲
三丈夫子。鼎立頗頗。凡夢中神所許。稽具數無
一不合。咄咄怪事。乃如此。唐墓骨後。又于宋常
朝殿掘。冬青樹植于所。函土堆上有詩云云。

王英孫

英孫字才翁

一作子才

號脩竹會稽人少保端明

殿學士克謙之子仕將作監主簿家饒于貲宋
亡後延致四方名士賦詠相娛與山陰徐受之
天祐並為一時人士所宗

林霽山王脩竹詩序云予數從公游嘯吟泉石
每一篇出有飛出宇宙之概已而歛入綠粟寂
乎無聲使人三歎不能已

岳武穆王墓

埋骨西湖土一丘殘陽荒草幾經秋中原望斷因公死

北客猶能說舊愁

武林舊事

題高房山夜山圖

等閒吳越在毫端疊嶂微茫月影寒一曲危闌人獨倚

江山渾在夢中看

鐵網珊瑚

寶林寺

飛來幾千載臺殿壓岩崑落日飛仙鼠秋風下健鵬山
腰微露石海眼暗通潮堪歎元英後詩名竟寂寥

越詠

陳觀國

觀國字用賓會稽人王脩竹監簿之友

送鄧牧心出陶山

青山無送迎幽人自來去落葉若相送卷卷及行屨簷
端有孤雲仍為守其處落葉惜人不在山孤雲尚期人

再還斯人可期復可惜我處落葉孤雲閒

吳禮部詩話

柴元彪

元彪字炳中號澤臞居士官察推有韞線集

錢唐懷古

百年朝市舊登覽若為情落日銅駝陌東風夾馬營路
隨荆棘斷城與黍離平可惜西湖月燒燈兩度晴

僧房夜冷

山冷沒禁當那堪更漏長寒欺秋後扇風試夜來霜茭

白心如墨冬青子亦黃祇宜煨芋栗齧引對緇郎

秋日江郎道中

豆花疎雨浥輕埃野店新涼入酒杯
草帶斷烟棲古道樹含殘靄翳荒臺
湖光隱見萍分合山色有無雲去來
滿眼秋光無盡意三峯萬古碧崔嵬

灌花

小圃辛勤植衆芳年年雨露借恩光
近來天氣高難問抱甕從朝到夕陽

上中齋相公

年年長是客天涯幾向天涯夢到家歸到故家無一事

免葵鷓粟正開花

以上柴氏四隱集

黃庚

庚字星甫天台人嘗客山陰王脩竹監簿家與
嚴陵胡天放永嘉林霽山遊越中詩社試枕易
題推為第一有月屋漫橐

王脩竹館舍即事

池館翠涼處寬閒稱客居
未仙猶閨苑不夢亦華胥
竹淨堪居鶴荷香欲醉魚
心清無箇事長日一編書

秋色

山陰詩社中選

憑高望不極望斷動愁情
落日淒涼處西風點染成
丹楓明野驛白水浸江城
馬上人回首戎戎黯客程

鶴林仙壇寺

古壇歸鶴杳野鹿自成羣
嵐氣浮清曉鐘聲出白雲
樹穿僧屋老水到寺門分
人世無窮事山中了不聞

見雁有懷

滿眼西風憶故廬
親朋音問久相疎
年年江上無情雁
只帶秋來不帶書

枕易

越中詩社試題都魁

古鼎烟銷倦點朱
脩然高臥夜寒初
四簷寂寂半牀夢
兩鬢蕭蕭一卷書
日月冥心知代謝
陰陽回首驗盈虛
起來萬象皆吾有
收拾乾坤在草廬

舟次擣摘廟

短檣衝寒過浦東扁舟一葉載詩翁
斷烟流水殘鴉外古木荒祠夕照中
吟罷小樓何處笛酒醒孤枕半江風
潮生潮落朝還暮堪歎浮生似轉蓬

偶書

頻年蹤跡墮江湖三徑苔荒憶舊廬
身老方知生計拙家貧漸覺故人疎
松薪拾去朝炊黍漁火分來夜讀書
怨鶴驚猿應待我台山何日賦歸歟

以上月屋漫稿

顧逢

逢字君際吳郡人宋末舉進士不第學詩于周
弼稱顧五言自署其居為五字田家後辟吳縣
學官別號梅山樵叟有船窗夜話負暄雜錄及
詩集

善權寺

英臺讀書地舊刻字猶存一閣出霄漢萬松連寺門洞
深雲氣冷池淺鹿行渾山下流來水風雷日夜喧

宜興
縣志

早秋湖上

藕花香裏去，獨坐自尋詩。
秋意在何處？夕陽將下時。
鳥幽忘立久，山好覺行遲。
飲興忽然動，橋邊有酒旗。

雪中同鄭所南訪趙溪梅

移宅雖然遠，攜筇到兩回。
只知相別去，不道又重來。
溪鰾和冰煮，鄰醅帶雪開。
詩家堪入畫，滿眼玉樓臺。

木難

以上
珊瑚

林同

同字子真，號空齋處士。福清人以世澤授官棄

不仕元兵至福州監丞劉全子糾義兵即其家
置忠義局敵至同死之有孝詩一卷

劉後村跋子真性純孝父寒齋病左右侍湯藥
至不忍入州應舉嘗赴胄試自里抵家得詩一
卷十之九皆思親之言年未四十慨然罷舉志
尤潔非躬耕不食植梅百株日哦其下

魏孝子

役于大國陟彼岵兮瞻望母兮狄仁傑登
山望雲曰吾親舍其下

念母嗟陟岵思親徒望雲可憐魏孝子不比狄參軍

韓伯瑜

母杖不痛哀母力弱對母悲泣梁彥先使
焦通觀其像通感悟盡孝

母力今衰矣悲啼得杖輕流風在繪像猶足感焦生

徐庶

辭先主曰老母見獲方寸亂矣王陵母曰為語陵母以老妾故持二心

不勝方寸亂豈暇二心持忍矣王陵將賢哉徐庶辭

桓沖

小字買德郎母病須羊以解以身質羊後為江州刺史

不辭身作質只為母須羊此日江州牧當年買德郎

文中子

汾水之曲有先人之敝廬在有田可以具饘粥彈琴著書不願仕也

先人舊所理汾曲有田廬何意求聞達彈琴自著書

王悅

導之子有高名事親色養諸子莫及導見輒有喜色

色養傾餘子高名重一時足為丞相喜豈計外人知

木蘭

古樂府云阿爺無大兒木蘭無長兄願為市鞍馬從此替爺征

謹勿悲生女均之有至情縈能贖父罪蘭亦替爺征

以上

孝詩

陳巖

巖字清隱青陽人生宋末有九華詩集

會仙峯

在九華中峯之側趙知微嘗中秋遇雨率其徒登峯上月出雲淨諸峯呈露及歸復雨因名之

仙袂飄飄拂翠巔知微來此宴羣仙人間風雨山間月

始信仙家別有天

碧桃巖

自要貪閒非避秦
洞門隔斷世間塵
山中不置四時歷
開到碧桃知是春

以上九華山志

馬南寶

南寶香山人景炎二年端宗航海過邑獻粟
石拜權工部侍郎宋亡于厓山被執死之

句

目擊匡門天地改寸心難與夜潮消 衆星耿耿滄溟

底恨不同歸一少微

廣東通志

王奕

奕字伯敬玉山人官本州教授自號玉斗山人
有東行斐稿

絕句呈周日湖

草帶黏天只辨星燧樓盡化作郵亭柳橋梅驛多來使

只寄山中養鶴經

玉斗山人集

送謝疊山先生北行

皇天久矣眼垂青盼盼先生此一行遺表不隨諸葛死
離騷長伴屈原清兩生無補秦興廢一出仍關魯重輕
白骨青山如得所何須兒女哭清明

西江詩話

何行

行字自強廣昌人生宋末為武平令

題龍泉觀

蓬萊境界隔風烟一帶銀河接九天禮斗瑤臺春草合

恭龍石鉢玉沙圓紅雲幾片危樓上古木千尋落照邊
惆悵仙人何處去空餘月色滿山川

西江詩話

吳侔

侔字尚賢歙人有漁磯脍語

句

舊聞有西山松風六月寒明當整襟屨舒笑青雲端招
手塵外人淪泉采芳蓀

夏暑 方回桐江集

江凱

凱字伯幾號雪砵婺源旃阡人許山屋之客山
屋愛之妻以子

相士俞方塘

方塘之鑒形可識方諸之鑒心始得相形何如更論心
以貌取人當有失君不見虞皇項籍兩重瞳成湯曹交
皆九尺

新安文獻志

汪炎昶

炎昶字懋遠婺源人紫巖族孫有古逸民詩集

趙東山云古逸先生詩微婉道勁亦時出于悲壯激烈

書興

時時溪上行或與幽人遇手把一編書共倚崖邊樹
近始暫飛魚驚卻重聚佳景不待求足熟自知處稚子
愛相隨似亦耽幽趣

香巖院

聲確疲幽徑扶持仗瘦筇斷崖何處路細雨隔山鐘
竊重簾果僧樵臥澗松人言深僻處別更有靈蹤

南山

宣平隱處今始過烟霞城郭路幾何野渡誰浮夕陽艇
空山尚響樵人歌石壇荒涼疊苔蘚谷鳥啁晰深松蘿
何當更值買酒至一笑使我朱顏酡

聞笛

荒村犬吠人猶行驚鳥亂啼山月明南鄰擣砧適復罷
何處吹笛秋更清疑含白龍堆外怨不恨黃鶴樓中聽
螢飛露下百草溼倚風激烈思平生

過往歲避地之所屋毀人遷

依舊蒼苔小徑斜當時從此入山家心疑謬誤還疑是

雨溼棠梨一樹花

以上新安文獻志

黃誠性

挽文丞相

三百餘年樂育恩晚從科目得斯人
崎嶇嶺海期年國零落羶毛萬死身
諸葛未亡猶有漢包胥欲泣更無秦
挑燈忼慨歌梁父鬢髮蕭森懣鬼神

吳禮部詩話

葉林

林字儒藻一字元文

一作去文

號本錢唐人生

宋末隱大滌山沖天觀與鄧牧深相得或欲薦之朝聞其清議而止大德丙午書偈案上泊然而化衆稱高行先生

至道宮

猶存巨鑊記熙豐翠靄春深古路通千百春鋤一株樹

野田飛下雪花風

洞霄圖志

石室洞

低垂石室洞杖屨易躋攀有路穿雲窟無門對月關誰
騎仙鹿去我笑國蝸跽若使今猶昨清宵聞珮環

又登石室作

遠遊貞白二仙家今日追尋路不賒七十二叢秋色裏
有人曾約去看花

石徑春深疊古苔洞天無鑰為誰開白雲本是無心物

風趁松花作雨來

以上洞霄詩集

鄧剡

剡字光薦號中齋廬陵人祥興時歷官禮部侍郎丞相文信公客也厓山兵潰為張弘範所得教其次子得放還有中齋集

挽文信公詩

憶公淚懸河九地無處瀉想公騎赤龍請命蒼梧野世人醉生死翻笑獨醒者焉知千載英精爽皎不夜義士無廢興時運有代謝念昔喪亂初公騎使君馬奮袂起

勤王忼慨淚盈把須臾三萬衆如自九天下燈檠書檄
交笑語雜悲咤捧土障洪河一繩維大廈至哉朝宗性
百折終不舍身止冠自南血碧心冑化顏鉤凜忠勁杜
詩蔚騷雅晉陽骨肉冤東市刀兵解精誠揭天日氣魄
動夷夏丈夫如此何一死尤足怕田橫老賓客白髮餘
息假有時夢巖電意悟當飄灑非無中丞傳殺青自誰
寫魂歸哀江南千秋俎鄉社

吳禮部詩話

鷓鴣詞

行不得也哥哥瘦妻弱子羸牸馱天長地濶多網羅南
音漸少北語多肉飛不起可奈何行不得也哥哥

遂昌雜錄

步月

盈盈當春月含情隔幽櫺好懷不自制起坐可一庭百
蟲未敢怨卉木正蔥菁餘光散草露乃復似秋螢

夜聞雨聲歸思浩然

西風響高樹鄉夢去帆前稚子衡門下先瑩亂葉邊老
來多一出歸去恰經年海燕巢何晚秋期落爾先

午坐後亭

隔簾遲日午風微
社燕驚寒未肯歸
讀了丹經成默坐
時時一片杏花飛

望夫山

朝望夫暮望夫
一夕化作山石枯
潮水去卻回行人來
不來

以上天下同文集

題龍山鐘

豐山背後鐘
霜月平原定
夜半響鯨音
隱隱天地應
山

靈鶴夢醒獨聽還獨詠蕭蕭蓬蒿中收入杜陵徑

青原山志

避亂至烏巖山贈承節趙公

山在香山縣東南

流水桃花又避秦
誅茅西崦結為鄰
如公尚友浮丘伯
顧我早師梅子真
棊酒從容新里社
衣冠蕭散古遺民
他年史傳收芳跡
應許牽聯作隱人

廣東通志

甘泳

泳字泳之一字中夫崇仁人生宋末工詩不娶

有東溪集

自述

總角希聞道殘生乃付詩未曾前輩識敢辱近人知飄泊身餘健蕭閒鬢欲衰一簾書四壁寒日在清池

過南湖

忽有一事礙胸次擺脫不去呼酒來溟溟濛濛混沌在坦坦蕩蕩虛空開精神一生留筆墨形骸昨夜為尊罍年年看梅今白髮晴日江路行莓苔

以上天下同文集

林昉

昉三山人

送西秦張仲實遊大滌洞天

此時仙興發九鎖訪名峯玉洞晝飛鼠石池春浴龍異
人花外見道士酒邊逢余欲采芳茗白雲何所從

洞霄詩集

羅公升

公升字時翁吉之永豐人大父開禮從文丞相
勤王兵敗被執不食死公升以軍功授本邑尉
北游圖恢復不果有滄洲先生集

秋懷

舊日方山子淒涼寄一簞蟲聲來倦枕秋思入凭闌已
是肱三折那堪指一彈中宵更風雨誰念客羶寒

避地

雨急啼鴉切山昏去客奔竄身楚南極獨立鄭東門卜
處無神玆招餘有斷魂死生毫髮事不足累乾坤
四海風濤日誰與柱急流山東雄劇孟薊北化田疇氣
靜天闊晚星沈戍角秋如君關氣數寧不重離憂

演福寺


賈妃墓處

韓崔當年讓福人

妃與謝后俱入宮穆陵主意于賈楊太后曰謝家有福遂立謝后

早亡何用羨長春帝鄉坏土真無憾愁絕龍沙萬里身

以上滄洲集



宋詩紀事卷七十九

欽定四庫全書

集部
宋詩紀事卷八十

詳校官監察御史臣李陽樾

侍讀臣孫球覆勘

總校官進士臣繆琪

校對官中書臣朱圻

謄錄監生臣李學瞻

欽定四庫全書

宋詩紀事卷八十

錢塘厲鶚撰

鄭思肖

思肖字憶翁號所南福州連江人太學上舍應
博學宏詞科元兵南下叩閣上太后幼主疏辭
切直忤當路不報遂客吳下寄食城南報國寺
以終有錦錢集一百二十四圖詩集成淳集中
興集

欽定四庫全書

卷八十

輟耕錄先生剛介有立志會天兵南叩闕上疏
犯新禁衆爭目之由是遂變今名曰肖曰南義
不忘趙北面他姓也隱居吳下一室蕭然坐必
南向歲時伏臘望南野哭而再拜乃返人莫識
焉工畫墨蘭不妄與人邑宰求之不得聞先生
有田三十畝因脅以賦役取先生怒曰頭可斫
蘭不可得過齊子芳之書壑云此世但除君父
外不曾別受一人恩寒菊云潔寒不藉水為命
去國自同金鑄心其忠肝義膽于此可見
道民錄所南初名景宋亡乃改名思肖即思趙
憶翁與所南皆寓意也坐臥不北向扁其堂曰
本穴世界以本之十置下文則大宋也精墨蘭
自更祚後為蘭不畫土根無所憑藉或問其故
則云地為人奪去汝猶不知耶

伯牙絕弦圖

終不求人更賞音只當仰面看山林一雙閒手無聊賴
滿地斜陽是此心

秦女吹簫圖

弄玉飄飄仙女姿鳳皇低舞久相期簫中應有別一曲
飛上青天影外吹

以上一百二十圖詩集

逢陳宜之

行李苦役役相逢古潤州千金一夜醉四海十年遊山
靜鬼行月宵涼人夢秋近聞邊事急畎畝得無憂

送友人歸

年高雪滿簪
喚渡浙江尋
花落一杯酒
月明千里心
鳳凰身
宇宙麋鹿性
山林別後空
回首冥冥煙樹深

防隱者

石竇雲封隱者家
一溪流水繞門斜
滿山落葉無行路
樹上寒猿剥蘚花

春日登城

城頭啼鳥隔花鳴
城外遊人傷水行
遙認孤帆何處去

柳塘烟重不分明

春詞

春氣暄妍御夾紗
玉釵雙袅綠雲斜
倚欄看徧庭前樹
盡是枝頭結子花

懷友

今日樽前忽憶君
為憐秋事又平分
坐來凝睇西風久
過盡天邊數片雲

春日遊承天寺

野梅香軟雨新晴來此閒聽笑語聲不管少年人老去
春風歲歲闔閭城

湖上漫賦

蘚崖蒼潤雨初乾石罅飛泉噴雪寒啼斷禽聲山更靜
青松影下倚闌干

以上咸淳集

隱居謠

布衣暖菜羹香詩書滋味長

醉鄉

江湖初上玉船空
假道青州一水通
相去塵寰千萬里
不愁日夜不春風

以上中興集

自題推蓬圖

清曉清風吹過後
露出青青一罇天
一似推蓬偷看見
竹林半抹古蒼煙

自題墨竹

萬頃琅玕壓碧雲
清風幽興渺無垠
當時首肯說不得
不意相知有此君

以上鐵網珊瑚

龔 開

開字聖予號翠巖淮陰人

吳萊桑海遺錄序聖予嘗與陸秀夫同居廣陵幕府宋亡潛居深隱立則沮洳坐無几席一子名浚每令俯伏就其背按紙作唐馬圖風駿霧鬣豪軒蘭筋備盡諸態一持出人輒以數十金易之藉是不飢然竟以無所求而死居吳之日高郵龔璠為忘年友時人謂之楚兩龔以比漢之兩龔

高馬小兒圖

華驄料肥九分臙童子身長五尺饒青絲鞵短金勒緊

春風去去人馬驍莫作尋常廝養看沙陀義兒皆好漢
此兒此馬俱可憐馬方三齒兒未冠天真爛漫好容儀
楚楚衣裝無不宜豈比五陵年少輩胭脂坡下鬪輕肥
四海風塵雖已息人才自少當愛惜如此小兒如此馬
它日應須萬人敵老夫出無驢可騎乃有此馬騎此兒
呼兒回頭為小駐停鞭聽我新吟詩兒不回頭馬行疾
老夫對之空嘖嘖

黑馬圖

八尺龍媒出墨池崑崙月窟等閒馳幽州俠客夜騎去
行過陰山鬼不知

瘦馬圖

一從雲霧降天關空盡先朝十二閑今日有誰憐瘦骨
夕陽沙岸影如山

以上吳禮部詩話

湯屋畫鑒云此詩贈炙人口真有盛唐風致

陸右丞君實輓詩

立事寧將敗事論在邊難與在朝分從來大地為滄海

可得孤臣抱幼君南北一家今又見乾坤再造古曾聞
他年自有春秋筆不比田橫祭墓文

數關天地人何與分在君臣禮可無周粟如山夷叔餒
史書猶曰曰嬰誣舊邦新命方開化公法私情本不渝
忠義未湏論彼此後先崇長是昌圖

以上陸右丞蹈海錄

自題中山出遊圖

髯君家本住中山駕言出遊安所適謂為小獵無鷹犬
以為意行有家室阿妹韶容見靚妝五色臙脂最宜黑

道逢驛舍須少憩，古屋無人供酒食。赤幘烏衫固可烹，美人清血終難得。不如歸飲中山釀，一醉三年萬緣息。卻愁有物覩高明，八姨豪買他人宅。侍闕君醒為婦除馬嵬，金馱去無跡。

鐵網珊瑚翠巖自記人言墨鬼為戲筆是大不然此乃書家之草聖也宜有不善真書而能作草者在昔善畫墨鬼有似頗真趙千里千里丁香鬼誠為奇特所惜去人物科大遠故人得以戲筆目之頗真鬼雖甚工然其用意猥近甚者作髯君野潤一豪猪即之妹子持杖披襟趕逐此何為者耶僕今作中山出游圖蓋欲一酒頤真之陋底不廢翰墨清玩譬之書猶真行之間

也鍾馗事絕少僕前後為詩未免重用今即他
事成篇聊出新意焉耳

僕為虛谷先生作玉豹馬先生有詩見酬極筆勢
之馳騁乃以此詩報謝

南山有雄豹隱霧成變化竒姿驚世人毛物亦增價天
上房星浥瑞光孕成白馬而黑章為誰容易來中國風
雪天山道路長頭為王欲得方目為相欲得明脊為將
軍欲得強腹為城郭欲得張絕憐此馬皆具足十五肋
中包腎腸嗟予老去有馬癖豈但障泥知愛惜千金市

駿已無人秃筆松煤聊自得君侯昔如汗血駒名場萬
馬曾先驅山林鐘鼎今何有歲晚江湖託著書白雲未
信仙鄉遠黃髮鬢髮健有餘飲酒百川猶一吸吟詩何
嫌萬夫敵我持此馬將安歸投之君侯如獻璧君侯作
詩凜馳驚八荒滿盈動雷雨定知此馬知此意獨欠老
奚通馬語曹將軍杜工部各有一心存萬古其傳非畫
亦非詩要在我輩之襟期君侯君侯知不知

鐵網珊瑚

自題山水卷

谷口長松澗底藤石橋山路晚登登囊琴斗酒來何暮
空負寒齋昨夜燈

退谷消夏記

題趙鷗波高士圖

雪氣侵人臥欲僵苦勞明府到藜牀主賓問答皆情話
何用閒名入薦章

式古堂書考

張逢原

逢原字淵甫鹽官人橫浦先生之後官漳州簽
判宋亡不仕句曲外史伯雨其孫也

題高房山夜山圖

地位清高眼界寬，盡收風景入毫端。
廢宮臺榭和煙鎖，隔岸江山對月看。
一水中分吳越近，層樓低接斗牛寒。
有聲畫意吟難了，更把瑤琴膝上彈。

鐵網珊瑚

王 鉉

鉉字介翁，括蒼人。嘗官縣尉，當帝昺播遷，棄印綬歸隱湖山。與尹綠坡、虞君集、葉柘山諸人結社賦詩，有月洞吟。

送默然上人歸天台

孤雲不定心持鉢度寒林野飯青蒲潔客程黃葉深
風潮水發山雨曉煙沈歸到石橋日應看瀑布吟

早行

客程因太早卻費一更眠落月已歸海殘星猶在天
聲荷葉浦螢火豆花田隅岸誰家起青燈遠樹邊

谿村

水路隨山轉谿晴踏軟沙斜陽曬魚網疎竹露人家
行

螭上枯岸飢禽銜落花老翁分石坐閒話到桑麻

古杭感事

國事彫零王氣衰東南豪傑竟何之雲埋廢殿排班石
草臥前朝記事碑沙漲浙江龍去遠天寬北闕鳳歸遲
可憐不老吳山月曾照官家寵幸時

尹綠坡山閒吟所

苔痕分路見人家犬護籬根臥落花一片林塘詩境界
四時花果隱生涯鉏山揀日春栽藥汲水和雲夜煮茶

耕錄有文須點者旋搖松露入朱砂

訪庭植上人

苔侵坐處石頭青滿屋春雲不用扃
入定醒來香印冷
一簾花雨溼殘經

段橋春望

拾翠車閒輦路塵山南山北杜鵑春
誰家庭院東風裏
吹出桃花不見人

栽衣曲

燒罷心香午夜闌
玉纖輕捻剪刀寒
衣成恐不如郎意
獨試燈前照影看

春酌

酒闌歌罷翠簾遮
月柳驚啼子夜鴉
多少斷雲心上事
結成香夢是梨花

燈花

喜信今宵報與誰
玉人曾翦畫雙眉
等閒開落銀缸見
只閉春風不得知

以上月洞吟

萬壽

壽字愚公仙居人

中秋寄陳碧棲

秋氣清如此秋花香奈何人生還健在月色況明多有
酒君當醉無愁我欲歌樓高俯松頂誰共酌姮娥

絕句

少日時時負百憂從人絡馬與牽牛中年置此身如竹

荏苒風前得自由

以上吳禮部詩話

杜濬之

濬之字若川金華人旃之孫領鄉貢宋亡矯行
晦迹寄食西峯僧寺以終

述志詩

寧枉百里步曲水不可息寧忍三日飢邪蒿不可食雖
云食息頃便分淑與慝志士當暮年聞道轉歷歷要使
此一身如琢復如滌整冠與納履微嫌費疏剔未若爪
李地絕不見吾迹

書警

食李弗言苦食梅弗嫌酸不為身所累且從心所安吾
分固云薄吾志亦非單靜看如山禍差之一念間所得
甚眇眇所喪已漫漫百年修不足一朝容易殘雖處四
壁立如享萬鍾寬靜坐明月窟濯足清風灘

以上金華府志

錢仲鼎

仲鼎字德鈞通州人宋末領鄉薦

題趙鷗波高士圖

在昔洛陽雪深丈餘士也高臥來令尹車今年吳淞雪
復何如積素一色鷗鷺有無之子江臯修亭是居
有琴有書有酒有魚賞靜獨眺聊以自娛挹茲清風凜
凜起余此景此圖再卷再舒

水村歌

舟搖搖兮風嫋嫋兮波鱗鱗兮鷗翩翩兮扣舷漁歌兮

孰知其他兮

以上珊瑚網

胡一桂

一桂字廷芳婺源人宋末鄉貢進士學者稱雙

湖先生

冬至寓建陽作

繡日添漢宮書雲紀晉觀山家獨奚為剛腸占易象幽
人意欣然起坐視晴漢大化回初陽茫茫今已旦川泳
有遊魚雲飛見翔雁滯畱本何心永懷發孤歎誠哉利
攸往觀辭思過半

新安文獻志

陳普

普字尚德閩之寧德人為恂齋韓氏門人韓出
于慶元輔氏蓋考亭的派也宋亡後三辟為本
省教授不起有石堂集

秋日即事

夜牀輾轉恨明遲
曉髮梳寒倚竹扉
樹影紙窗風作色
葦聲壁罅月流輝
三杯白酒窮年客
滿篋紅塵隔歲衣
遙想閒鷗江上路
蓼花楓葉雨霏霏

野步六言

黃犢眠中荒草鷺鷥立處枯荷宦海風濤舟楫故山烟
雨松蘿

紅葉林風颯颯蒼苔徑雨斑斑人跡石邊流水樵歌鳥
外青山

自哂

鬪雞走馬醉高陽今日歸來兩鬢霜無限少年心上事
半簾豆雨語寒螿

荀彧

亂離揀得一枝棲得道爭知卻是迷曹操若逢諸葛亮
暮年當作漢征西

北地王諶

何物譙周口似簧幾年漢帝手牽羊紛紛蜀土祠諸葛
香火曾分北地王

顏杲卿

驪宮歌笑入青雲曾識常山有戰塵忠骨已嘶餘髮在
因人得見夢中身

以上石堂集

湘烟錄此詩蓋指果卿見夢明皇妻疑髮動之事

蘇壽元

壽元字仁仲號北溪安福人

贈風鑑

空有奇胸貯石渠功名不許老頭顱
憑君細閱寒窗下
還有他年房杜無

四朝詩

韓性同

性同字伯循別號古遺與陳石堂同里而及其

門人元不仕

岳王墓

妖星墮地芒角赤龍劒悲號風蕭瑟中原王氣挽不回
將軍一死為毛擲秦家小兒真戲劇播弄造化搖樞極
指讐為親忠且逆隻手上遮天眼碧九重茫茫隔天日
無由下燭臣愚直臣愚萬死不足惜國恥未湔猶憤激
古墳埋冤血空瀝風雨年年土花蝕我恐精忠埋不得
白日英魂土中泣請將衰骨斲苔痕獻作吾皇補天石

曹氏歷代詩選

孫嵩

嵩字元京號艮山休寧人以薦入太學有艮山集

朱大同云孫上舍宋亡後歸隱海寧山中自號艮山示不復仕杜門賦詠鍛苦鍊枯棲斷淪絕以寄其沒世無涯之悲時婺源有制幹許月卿先生者亦宋進士宋亡歸隱製齊衰服之以居月卿壻江凱及汪炎昶皆絕意當世俱從嵩遊其詩悲壯激烈讀之可知其為人

開歲連日陰雨

老杜詩章五百年為吾替寫早春篇
恰從元日踰人日
重有陰陰冷落天

日日嵐陰守翠微
清溪平沒釣魚磯
流鶯一任無來意
直恐梅花半樹稀

新草天涯入斷魂
若為有意眺郊原
只應老子春愁少
須著瀟瀟雨暗村

覓佳山水遷居未能又力役不休

微吟清嘯有孤懷
歷落巖崎已大乖
芳草何心知世事

閒雲肆意繞天涯前時絕喜王官谷此去聊堪阿里街
一語作銘君記取騰騰任運莫安排

竹枝詞

瀘瀕堆頭君莫行瞿塘峽裏不論程龍吟小雨蜀天黑
等有明朝春水生

峽路陰陰無四時寒雲鳥道挂天危荒亭敗驛此何處
望帝江山聞子規

黃牛廟前鴉鵲棲黃魔宮外梟鵬啼估客酹神巫嫗醉

青林日轉風淒淒

生日

雲外荒村半掩扉門弧事業與心違悠悠歲月山林老
納納乾坤道路非鴻雁關河秋滿眼梧桐風雨冷侵衣
蓼莪自是長休廢獨立蒼茫一歎欷

哭程晦夫

握手論文意氣真舊遊四顧黯傷神陪從金馬門中客
和唱銅駝陌上春尚謂鄉邦離有合忍聞丘壟夜無晨

久陽古道曾經別腸斷西風淚滿巾

以上方回桐江集

曲江頭

君不見曲江頭離離衰草寒雲秋
人不見昔人遊昔人不見今人愁
欲談往事無耆舊沈吟千載空搔首
盛衰倚伏如寒暄秦時宜春苑漢世樂遊園
更復唐人宮殿擁千門往來古今但如此
同一溶溶曲江水

秋懷

秋蟲日以喧秋樹日以疎
君聽草根蒼泣弔風中梧壯

士秋懷涕及此清霜初

從來感秋人一例皆楚聲吾聞古燕趙慷慨多不平惜
哉宋玉辭不使荆軻聽

何處秋聲多竹外聲歷歷淒切不禁寒蕭蕭舊時碧此
中白髮愁餉與秋風客

疇昔旅江湖夜夜南飛雁山園柿栗多出戶望河漢祇
令寒雁時中夕起三歎

黃山秋雕鏤風露洗崖甍行行聽清猿處處采靈藥秋

雲老石牀已後十年約

冬夜雜興

牧童與樵叟共載牛背歸我無薪蒸計南山松櫟稀寒
風昨日至須用葺我扉破扉故可葺何以完我衣人生
有定分勿怪生理微

行都餞歲

插架餘殘歷挑燈憶故鄉年光蛇赴壑羈跡雁隨陽禁
闕迎讎鼓鄰街祭竈香英雄須自力容易鬢毛蒼

臨安錢武肅廟

吳越歸旗纛風雲初鼓輦錦蒙山樹徧弩射海潮低龍
鳳城蔥鬱牛羊墓慘悽古祠存故里秋草廡東西

春日武康遊望過孟東野故居

殘靄初收半在沙一川芳草趁溪斜羣峯古意汪芒國
廢地詩情正曜家天末淒迷浮野色柳邊駘蕩受春華
更攜尊酒看修竹不為前陂得意花

紫陽夜坐

一夜燈前白紵單
沈吟有此夏初寒
露零若與人相語
松杪蕭蕭下石壇

姑蘇元夕

茂苑長洲滿地春
吳兒歌舞逐時新
風流百巧花燈手
猶是夫差國裏人

以上新安文獻志

孫巖

巖字次臯號爽山
嵩之弟有爽山集

方虛谷序云長孫君嵩元京詩清勁苦淡如其
為人小孫君巖次臯予未之識忽袖詩訪于武

林亦清勁苦淡如其兄

去冬過石潭上時吳義夫同行欣然謂予曰詩境
甚佳今日再過有作將寄義夫

長潭有令姿山綠納空洞軒軒吳武陵曾此接飛鞚殷
勤顧我笑詩材不勝用重來春事深物采尤錯綜褚小
強懷大秀異甯受控沈吟日已昃十鼓纔一中故人抱
才藻衆象入嘲弄即今溫水館匡坐教弦誦嗟哉實前
語東轅代萊棟明當寄東風烟水發清夢

畱武林

訪客城南隅故第何其雄曲池猶養潏土山尚籠從頗
聞此中人易姓良恩恩往時恩澤侯意氣干晴虹樂曲
播秦城衣制聞漢宮恨不逢李倫詎甯交毛公斤地西
鄰去伐木南山空百楹一傳舍顧極當年工悠悠感成
敗何獨操餒翁

觀漁行

霜降平湖鑑羣象中有黃魚幾一丈漁師早已中豪家

今日連舟布新網東西南北三重圍圍形漸縮如小池
孟獲身窮呂布窘尚許性命延斯湏舊與鱗魴同出入
爾暇悲憐禍相及日斜創甚上平沙兩岸居人如堵立
渺渺腥風吹水雲賣魚沽酒賽湖神醉來預唱江南春
和元京兄賦蘋花

一春觀物眼紅紫厭續紛此水浮明玉何人翦白雲
風遊漢女吉日禮湘君地僻應無是畱花混藻芹

兵後續溪道中

古道緣流水寒郊帶斷烟
稀疎鴉種麥羞澀女耕田
人事休兵後秋懷落木前
小蘇遺翰墨今古一山川

方虛谷云休兵落木之句非近人晚進所能到

陳監丞用韻見贈亦和以謝

肅肅東方老依人可計年
名言傾蓋後古意結繩前
君戶仍多轍予琴故一弦
不應昌歎味置在衆看先

九日呈戴兄

一別三十載而今近講堂
蕭條同甲子強健又重陽
莫

菊數杯酒烟雲千仞岡偶然為此夢寧復次公狂

方虛谷云類陳后山

出越城舟行紆道以避過兵

擾擾紅巾起草間舊遊何地不搶殘歸囊薄有桃花米
行路如經竹節灘戰馬冬來橫殺氣扁舟北去解憂端
曲肱便結湏臾夢柳暗黟川把釣竿

武林絕句

繽紛迎酒伎宛轉賣花聲偶似承平世攜書試鳳城

比屋單衣日名城冷食天居人多上冢遠客未歸田

樹陰

春去空山啼乳鷺鷺邊老樹冪新青一瓢挂此坐終日

即是蘇家擇勝亭

以上新安文獻志

滕堞

堞宇仲塞號星崖婺源人

汪幼鳳云星崖常命其兄子舜父求文丞相遺墨舜父得所書過金陵驛詩以歸日懸于堂焚香拜泣又過西湖拜岳將軍墓有相對含悲石翁仲老衰無淚落秋風之句其忠義蓋天性也

東城

東城有高樓我冠城闕我來屬昏暮見此初上月遙
天羅江山極目如霽雪江山秀如此豈不生豪傑臨風
一高歌達曙何由歇

新安文獻志

張炎

炎字叔夏號玉田又號樂笑翁循王諸孫本西
秦人家臨安生于淳祐間宋亡落魄縱遊工為
長短句

鄧牧心云玉田春水一詞絕唱今古人以張春水目之

舒閨風云叔夏詩有姜堯章深婉之風

腰帶水

在奉化州西五十里

犀繞魚懸事已非水光猶自溼雲衣山中幾日渾無雨

一夜溪痕又減圍

延祐四明志

潘文虎

文虎字武子金沙人

寓言詞

為被虜婦作

交交桑扈交交桑扈桑滿牆陰三月暮去年蠶時處深
閨今年蠶時涉遠路路傍忽聞人采桑恨不相與攜傾
筐一身不蠶甘凍死祇憶兒女無衣裳

山房隨筆

陳森

森字茂卿婺州人生宋末卒以詩殉葬

南海南

連弩聲嘶黑風壯白日滄波影相盪神蛟一去還不還
淚溼空荒捲烟浪盤渦蜃氣高矗天老鯨巨鼇那忍眠

老鯨已化子獨返越山越水青茫然樓船夜半猩猩語

黃葛花開墜秋雨

金華詩粹

陳深

深字子微平江人宋亡棄舉子業閉門著書有

寧極齋稿

曹叔時見過索錢篇

泄雲蒙朝日微雨霑庭除幽人掩關臥門外無來車曹
子別經歲枉道過我廬謂余抱文藝胡為守鄉閭余曰

匪高尚褊性涉世疎上奉白髮親餘暇讀我書豈如叔
時甫妙年美名譽詞華爛絺繡問學滋新畬奉子一卮
酒聊為談斯須威鳳翔高閣逸驥騰雲衢及時樹遠業
臨事毋躊躇

內人臂白鸚鵡圖

華清宮中歌既醉南海奇禽遠爭致玉環最愛雪衣娘
當時曾得龍顏媚璿房雕檻春日長繡綳嬌兒在傍戲
君王憐汝解語言懷恩不說宮中祕臨風驚鳥何軒軒

歎惜純良遭猛厲
蒼翁寫出當時事
側立紅衫內人臂
江花滿地不忍看
空拂畫圖憐俊慧

南遊

驅車登遠道
白日忽西流
宇宙驚新夢
山河感舊遊
雲迷江令宅
月澹庾公樓
已已知何奈
長歌去國愁

悼亡

短日一何急
殘宵不甯明
霜寒那有夢
月落重傷情
壁凍琴絲斷
風驚燭淚盈
微言憶王衍
達理誤莊生

南湖史君製暗香湯奇甚賦絕句求之

霧閣雲窗深閉春微聞玉杵擣清聲元霜祇許雲英見

地上詩人渴夢生

自注時侍姬新至故戲及之 以上

劉鑑

鑑字清叟號立雪江西人少年才氣卓犖連蹇

不第中更世故蹙頰悲吟鰥居隱處年踰七十

而終有立雪橐

同門生鄧光薦序其第五橐云余嘗評君一生
琢對匠語洗削治擇齒牙閒纏纏有聲大率成

就精切二字而已今皮毛落盡孤立兀然雷霹
之琴火成之鏤潮湍激蓄之山皆自然成趣有
不假繩削而合蓋于是門外雪三尺矣得其髓
者非齊腰子不能

題醉月亭

采石江頭李太白狂不奈煩宮錦窄赤壁磯下蘇東坡
一葉泛泛凌風波當時有月并有酒和酒和月吞入口
酒腸得月冷于冰化作瑰辭喧宇宙兩首賦百篇詩千
秋萬古稱絕竒兩翁不作歸來鶴玉宇瓊樓寒漠漠若
得長江變潑醅少住人間亦差樂望圓晦缺秋復春古

來明月今來人我時舉酒問明月月亦團團磨不得鐵
如意玉唾壺我歌君和聲鳴鳴爛醉起舞嗔人扶問影
莫是李與蘇月中仙子知得無

寄朱約山

歲晚江空烟水寒楓林葉落楚天寬苦無雁足書難寄
作盡鶯聲吟未安晉帖臨成思入石離騷讀罷擬栽蘭
老來絕被梅花惱後會君應笑我孱

謁蕭小山

一冬晴暖春相似欲扣吟關未有詩折得梅花裝擔了
起程還是雪飛時

一水凝寒棹不開幾人于此欲船回思君卻有扁舟興
半夜直衝風雪來

以上立雪橐

葛慶龍

慶龍九江人寓越

霏雪錄葛慶龍號秋巖又號寄漁翁江南野道人
蚤年嘗入匡廬學浮屠法稱琦書記不樂遂
歸俗放浪江湖中公鉅卿酒徒劍客多與之
遊好為詩落落有氣每風日清美乘筍興遊天

衣雲門諸山年逾七袞覲齒童顏終歲不澡沐
肌體清潔衣垢不生蚤蟲化去王君理得函其
骨于仙人洞仍鐫石為肖像并一鶴于洞中在
山陰縣西北六十里至今稱葛仙洞

贈僧

七軸蓮經供茗瓢一龕繡佛挂松寮
舶香亦帶魚龍氣自采枝頭柏子燒

謝理得惠書

五朶飛來漬刺藤重重響似水泠泠不教落在紅塵耳
讀與青松白鶴聽

詠黃石公

挾書律重火猶光天下嚴搜不敢藏
圯上老人無見者一編親寫授張良

筇杖

白髮慵巾短短衣閒行斜倚小筇枝
自家弄影猶癡絕只似初騎竹馬時

題仙人洞并謝草堂方公所贈石匣

多謝林僧亦好奇新遺石匣我酬詩
鶴胎收卻雲封裏

付囑山靈木客時

雲長鎮洞有時開石匣終藏化鶴胎千歲不須華表柱

飛鳴南向洞山來

以上霏雪錄

遊寶林寺

坐如有待思依依看竹迴廊出寺遲
窈窕綠陰清寂處

半窗斜日兩僧棋

越詠

于石

石字介翁婺之蘭谿人業詞賦自負甚高宋亡

隱居不出一意于詩因居鄉自號紫巖晚徙城中更號兩谿有集

探梅分韻得香字

絕壁兩屨雲荒村半橋霜孤往欲何之林下幽徑長寒梅在何許臨風幾徜徉誰家斷籬外一枝寄林塘水靜不搖影竹深難護香無言獨倚樹山空月荒涼

路傍女

路傍誰家女躊躇不能去自言妾小時家本樵川住十

五嫁良人長年秉機杼辛勤奉舅姑足不越庭戶去年
秋棗紅邊人健如虎移家入深林自謂百無慮空山鳴
劍戟失色駭相顧星散各偷生不幸適相遇妾身如風
花飄零委塵土妾命如蜉蝣焉能保朝暮一死恨不早
空為年少誤去去忽相失零落在中路妾有乳下兒咿
啞方學語四海尚干戈安知爾生死回首望天涯家山
在何處妾命負所天顧影惟自憐自憐輕失節天下何
獨妾

我從山中遊

我從山中遊歸來林壑暝
澗水凍不流月出四山靜
柴扉不敢敲恐驚孤鶴醒
徘徊踏月明倚杖看松影

得家書

久客秋又晚思家夢屢驚
空階聞葉落隔樹見鐙明
親老貧常健兒癡學未成
淒涼今夜月將我故鄉情

半山亭

萬疊嵐光冷滴衣
清泉白石鎖烟扉
半山落日樵相語

一徑寒松僧獨歸
葉墮誤驚幽鳥去
林空不礙斷雲飛
層崖峭壁疑無路
忽有鐘聲出翠微

春事

白了江梅柳又青
遊絲千尺網紅塵
鶉鳩夫婦孤村雨
杜宇君臣故國春
客裏易添芳草思
樽前誰是去年人
桃花源上空流水
安得漁郎一問津

旅中遣懷

片雲相望浙東西
回首家山路欲迷
昨夜桐江江上夢

倒隨流水上雙谿

以上紫巖集

方夔

夔一名一夔字時佐淳安人生于宋季嘗從何
潛齋遊攻舉子業不利于有司退隱富山之麓
扁其堂曰綠猗授徒講學其閒自號知非子學
者稱富山先生有富山嬾藁

錢王守鳧墩在臨安道左

山下鐙龕挂紙錢水楊墩上草芊綿高人不要金丸用

買得三吳八十年

盧明之開鑪

嬾作西風汗漫遊
歸謀諸婦此淹留
采花墩近初成酒
種秫田多早帶秋
燕領已空西塞夢
犢禪莫遣遠山愁
滄江畱得偏醒客
袖手時凭百尺樓

九里路

去年九里路烏攢人
腸挂枯樹今年九里溪
沙頭白骨高復低
人生變滅如泥土
久後猶傳姜萬戶
翠眉紅頰

誰家兒夜赴軍前效首虜將軍多愛恩意疎分將吳口
充苞苴殷勤道與送行使前日朝官多有書

自注唐人
攻藩中朝

官多以書託主將求沒官妻妾

續感興

猛虎等百獸天賦與長雄曼胡秋利戟隅目磨青銅從
知世路暗羣行各西東吼地一長嘯颯颯來悲風飢來
待人肉不數豹與熊肥碩而黑喙不知是何蟲坐臥不
自防穴爾皮毛中爾虎雖云猛一旦皮骨空慎勿欺微

細卽且制神龍

惡木生高岡枝疎上指天雨露非有私蟠踞幾何年
莢子寢其下山鳥棲其巔匠石過不睨生理得自全
皮爲野火燒根爲螻蟻穿空中不足恃一朝踣而顛
上有千歲藤相依久纏綿樹猶不足保爾藤何足憐

二女灑竹淚盡是心中血精誠著于物千載猶不滅
當時從南巡豈少稷與契奈何比孤纍匍匐陽城謁
皇英獨何人風泉共幽咽可憐女子心慷慨男兒烈
湘水流

不斷誰道恩情絕何時見歸來續君遠離別

驚禽營顆粒飛飛集丘隅遊人困行役十年落江湖煌煌秦與洛運轉天下樞啟明曜東漢萬足爭奔趨豈無爪距力遠利如孫吳得失昧前料青雲閒泥塗天命有厚薄定分不可踰歸來北山下俯仰收桑榆

秋晚雜興

青溪溪上路書劍此棲遲涼月穿衣褐寒波照鬢絲古
桐傳賀若橫玉犯龜茲不為傷秋老孤吟自可悲

以上
富山

金應桂

應桂字一之號蓀壁錢唐人又號積慶山人

咸輔之佩楚軒客談一之雅標度能歐書受知賈似道晚居西湖南山中築蓀壁山房左弦右壺中設圖史古奇器客至撫摩諦玩清談纒纒不得休每肩輿入城府幅巾氅衣望之若神仙然

送西秦張仲實遊大滌洞天

山林有真趣得趣即神仙好趁暮春月來遊大滌天晴

嵐融玉室花氣襲丹泉此地通懸霤清吟過叔元

洞霄詩集

潘 詰

詰宋末人

經賈秋壑故第

相業如何不到頭諸公歷歷頌伊周夢迷葛嶺酣歌夜
鬼哭樊城血戰秋誤國正須憂大廈覆師寧忍駕孤舟
木棉庵裏催歸魄誰掩湖山富貴羞

杭州府志

汪楚狂

感慈元殿

翠華扶輦出龍庭
密炬星繁天未明
鵷鷺分行江上別
貔貅從駕雨中行
綠波淼淼浮三殿
紫禁沈沈斷六更
惟有周遭山似洛
不堪回首涕縱橫

忠義集

王沂孫

沂孫字聖與號碧山又號中仙會稽人與周公謹唐玉潛諸公倡和有詞名花外集

觀周曾秋塘圖有作

一字至七字款題琅耶聖與

秋秋蕭灑清幽人靜處水邊頭波紋細細風色颼颼鷗
鷺情相狎鳬鷺樂自由疎葦敗荷池沼白蘋紅蓼汀洲
幾竿漁釣去已盡一段晚雲寒不收

珊瑚網

周密

密字公謹號草窗濟南人流寓吳興居弁山自
號弁陽嘯翁又號蕭齋淳祐中為義烏令有蠟
屐集齊東野語癸辛雜識志雅堂雜鈔浩然齋
視聽鈔武林舊事澄懷錄雲烟過眼錄

鄧牧心序云蠟屐非屨非舄不足以忘足而阮
乎愛之詩發乎情性與蠟屐不類周公謹以名
其集豈以阮乎所以忘足者而忘心于詩物無
美惡溺于所愛皆不得為性情之正安得與詩
同日語然與為阮乎猶愈于祖約畏人況不為
阮乎者乎

南郊紀事

黃道宮羅瑞腦香袞龍升降佩鏘鏘大安輦奏乾安曲

萬點明星簇紫皇

萬騎雲從簇錦圍內官排立馬如飛九重閭闔開清曉

太母登樓望駕歸

西太乙宮

在孤山路舊四聖觀理宗朝建

藥宮廣殿號黃庭突兀浮雲最上層
五福貴神畱不住
水堂空照九枝燈

南園

光宗朝賜平原郡王韓侂冑陸放翁為記

清芬堂下千株桂猶是韓家舊賜園
白髮老翁和淚說
百年中見兩平原

甘園

內侍甘昇園又名湖曲曾經臨幸有御愛松
望湖亭小蓬萊西湖一曲

小小蓬萊在水中
乾淳舊賞有遺蹤
園林幾換東風主

畱得庭前御愛松

袞親崇壽寺

在鳳皇山劉貴妃功德三門有陳公儲畫龍

翟羽鸞綃事已空奉華遺寺對高松宮斜鳳去無人見

且看門前粉壁龍

奉華劉妃閣名以上武林舊事

韓氏慶樂園

舊事淒涼尚可尋斷碑閒臥草深深凌風閣下槎牙樹
當日人疑是水沈

齊東野語云四朝聞見錄載蜀帥獻韓平原沈香山高五丈立之南園凌風閣下今慶樂園即

南園也所謂香山尚巍然立于閣前乃枯拊耳
初非沈香也

為楊大芳悼亡

帳中蜨化真成夢鏡裏鸞孤枉斷腸吹徹玉簫人不見
世間難覓返魂香

癸辛雜識大芳娶謝氏謝亡未殮有蜨大如扇
其色紫褐翩翩自帳中徘徊飛集窗戶間終日
乃去

乙丑良月游大滌洞天書于蓬山堂

太虛灝氣浮空濛烟霞九鎖蓬萊宮崩騰雲木競奇秀

澗芳野實垂青紅何年斷鼇立天柱古洞陰森白鴉舞
玉書寶劔不可尋老翠封崖滴元乳光芒靈氣干斗牛
遺丹箬底誰能求黃精紫杞徧巖谷仙禽夜擣聲幽幽
嬾蛟千年睡未足癡涎吼雷噴飛瀑陰風黑穴吹海醒
石虎當關橫地軸是非萬古一笑慨神仙不死今安在
送西秦張仲實游大滌洞天

玉室金堂積翠邊舊游猶記劫灰前禽聲夜擣千年藥
花片春浮九鎖泉洞府暗通滄海路樓居何異化成仙

茶香筍美松醪熟正好山中過禁烟

以上洞霄詩集

題高房山夜山圖為江浙行省照磨李公畧作

郎潛暇日多冥搜夜深獨上千尺樓天回海立月政溼
風起雲涌山疑浮縈青繚白互變滅浮嵐飛霧寒飈颭
潛蚪棲鵲聲磔磔山鬼木客鳴呦呦城中癡兒方藝語
有夢不到千山幽遙岑寸碧目力遠欲逝汗漫凌風游
高侯落筆萬象泣寫出千古蒼茫愁無聲詩與有聲畫
一夕異事傳南州玉琴在膝酒在手欲寫天籟無莊周

憑誰為問華表鶴城郭人民今是不

鐵網珊瑚

題溫日觀葡萄

百八年尼顆攜將萬里游歸來還自笑何不博涼州

六硯

齊筆記

題高彥敬山村圖卷

為仇仁近作

我昔遊七閩百嶺爭截葉白雲漲川原深谷如積雪又
游天姥岑幽磴緣曲折長林翳寒日十里行落葉轉頭
五十年遐想正愁絕開圖意忽動懍恍生內熱何當駕

松广分我翠一疊并陽我所廬見謂山水窟漂零媿楸
櫝歲月老薇蕨平生阮遥集足痺屐齒折何當賦歸田
初志遂所愜懷哉復懷哉清夢繞林樾

清河書畫舫

句

繁華不結三春夢零落空餘寸草心

杭社試燈花
楚軒客談

佩

呂同老

同老濟南人有詞見樂府補題宋遺民也

丹泉

甯沸檻外泉遠出天柱陽清音應空谷潛波渙寒塘昔
人養靈芝長年此山旁金骨換玉髓素虬朝紫皇尚餘
浴丹池神光透扶桑蓬萊幾揚塵茲泉日泱泱我願滌
世氛朗詠三元章手持北斗杓下酌流霞漿

洞霄詩集

題高房山夜山圖

我昔絕江看吳山朝光正落山水閒金波遠自海門入
翠嵐高插扶桑殷安知瑤樓有夜景明月蒼茫墮清影
李侯勝賞高侯筆展卷一時如夢醒

鐵網珊瑚

龍泉寺納涼

靡靡市塵盡杳杳泉石閒灌木蔽榛莽爽籟彌空山飛
甍納餘輝丹雘粲以繁巍然青蓮宮俯此碧玉闌化人
淡無為趺坐觀塵寰支郎杳不逢元蟬噪其間昔賢憩
遊地智井潛龍蟠詠歌之所傳百世猶不刊我生悅超
曠危磴重躋攀歸隱諒未能溯風發長歎

越詠

鄭斗煥

斗煥字丙文號松窗弁陽老人周密編輯絕妙

好詞特載其人于宋末

陪秋山相公遊大滌洞天一庵夜宿感夢

天柱清游尾使星
筭輿輶輶入山深
龍行雨去泉花定
鶴叫雲來木葉陰
松石已安通夕寐
江湖空老百年心
圓冠方袂何仙子
夢裏將詩索共吟

洞霄詩集

宋詩紀事卷八十